

默
錢氏私誌
經筵玉音問答

王文正公筆錄
辯誣筆錄
梁谿漫志附錄



錢氏私誌

錢世昭撰

中華書局

叢書集成初編所選
歷代小史古今說海
學海類編皆收有此
書說海本在先故據
以排印

錢氏私誌

宋 錢世昭撰

神廟熙甯間。識宰相王岐公云。昭陵二女。皆朕之姑。卿可選勳賢之後有祖者尚之。岐公未有以奉詔。會大父寶開知台州。同光玉補試入太學。適與岐公之子敏甫同齋。敏甫告岐公云。近有一錢少監子。風骨不羣。文采富贍。恐可奉詔。岐公遂就啓聖院設齋。令敏甫盡召同舍。飯罷。岐公會茶。熟視光玉甚久。皆不喻其意。翊日。又令敏甫竊取所業。攜以進御。云。臣向奉詔。選勳賢之後尚主。今得吳越王錢某之孫。與臣男同齋。得其業。又奏啓聖親見之事。乞賜召見。上云。待其太皇商量。後數日有旨。令三班奉職曹詩進士錢某。又一人忘其姓名。於某月某日同候宣押。曹詩以本色服。光玉服布衣。已時候內侍宣押入內。至一小殿。殿內皆宮嬪。兩貴主在焉。引曹與光玉立于簾前。斯須。上小帽領出簾外。熟視云。簾外與簾內一般。顧左右。令止御樂。聽聖旨。簾內宮人傳旨。錢某可尚慶壽公主。曹詩可尚承壽公主。引入幕次更衣。各賜襲衣玉帶。服所賜畢。引至殿下謝恩。殿上軸簾。慈聖。裕陵。宣仁。欽聖。同坐。慈聖謂曹詩曰。你是我姪。曾見拊光玉背曰。錢郎好女婿。上云。是箇享福節度使。左右宮妃觀者如堵。上同三殿徐登步輦還內。樂聲漸遠。復引光玉與曹詩再入幕次。賜酒五行。執事皆宮人。飲罷。內侍復引至宮門。各以仗下御馬一疋。崇政殿親從官二十人導歸第。謂之宣繫玉帶。赴朝三日。除正刺史。卻繫方金御仙花帶。赴朝參。逾年。賢穆下降。三殿護送就第。太常鹵簿迎引。故事。下降後三日。貴主同副車詣景靈。

宮及入內謝畢，方見舅姑。舊例，貴主書堂垂簾坐，舅姑拜簾外。賢穆奏乞行常人禮，上與慈聖大喜，再三稱詔從請。上令中使宣諭宰執，是日幸執殿上稱賀。

賢穆乳母永嘉董夫人，一日入禁中，慈聖問云：「主以未得子爲念，爲甚不去玉仙聖母處求嗣？」董奏曰：「都尉不信，事須是官家娘娘處分。」後數日，光玉入禁中，上笑云：「董婆來娘娘處說都尉來。」光玉惶恐謝罪。欽聖云：「別沒事，只是娘娘要教主去玉仙求嗣。」董奏云：「都尉不信。」光玉奏云：「既得聖旨，安敢不信。」遂擇日與賢穆同詣玉仙，止留知觀。老道士一人祝香祈禱，道士見貴主車服之盛，歛衽富貴云：「願得貧道與大主作兒子，歸而有娠。」明年四月十五日，光玉欲赴朝，賢穆云：「我昨夜夢見玉仙觀知觀來，與我作孩兒。」亟遣人詣廟祈禱，且問道士勸靜，知觀自去年大主上廟後，便不安，不下牀多日矣。知觀在房內聞人聲，問云：「甚處人來？」報云：「錢大主臨牀，齋香燭祈禱。」知觀笑云：「來催我也。」是日告別，大父寶閣善推步，午時遣人來報，光玉云：「得數七十有九。」若今日酉時生，是箇有福節度使。伯兄果酉時生，平生淡薄，壽享正七十有九。

賢穆有荆雍大長公主牌印，金鑄也。金鞍勒，瑪瑙鞭，金撮角，紅藤下馬杌子，開國初貴主乘馬，元祐後不鑄印，無乘馬儀物。

歐文忠任河南推官，親一妓，時先文僖能政，爲西京留守，梅聖俞、謝希深、尹師魯同在幕下，惜歐有才無行，共白于公，屢徵輒而不之恤。一日宴于後園，客集而歐與妓俱不至，移時方來，在坐相視以目，公責

妓云。未至何也。妓云。中暑。往涼堂睡著。覺失金釵。猶未見。公曰。若得歐推官一詞。當爲償汝。歐卽席云。柳外輕雷池上雨。雨聲滴碎荷聲。小樓西角斷虹明。闌干倚徧。待得月華生。燕子飛來栖畫棟。玉鉤垂下簾旌。涼波不動簾紋平。水精雙枕。傍有墮釵橫。坐皆稱善。遂命妓滿酌賞歐。而令公庫償釵。戒歐當少戢。不惟不恤。翻以爲怨。後修五代史十國世家。痛毀吳越。又于歸田錄中。說文信數事。皆非美談。從祖希白嘗戒子孫。毋勸人陰事。賢者爲恩。不賢者爲怨。歐後爲人言其盜甥表云。喪厥夫而無託。攜孤女以來歸。張氏此時年方七歲。內翰伯見而笑云。七歲正是學簪錢時也。歐詞云。江南柳葉小。未成陰。人爲絲輕那忍折。爲憐枝嫩不勝吟。留取待春深。十四五。閒抱琵琶尋。堂上簪錢堂下走。恁時相見已留心。何況到如今。歐知貢舉時。落第舉人作醉蓬萊詞以譏之。詞極醜詆。今不錄。

岐公在翰苑時。中秋有月上。問當直學士是誰。左右以姓名對。命小殿對設二位。召來賜酒。公至殿側侍班。戢頃。女童小樂引步輩至。宣學士就坐。公奏。故事。無君臣對坐之禮。上云。天下無事。月色清美。與其醉聲色。何如與學士論文。若要正席。則外廷賜宴。正欲略去苛禮。放懷飲酒。公固請不已。再拜就坐。上引謝莊賦。李白詩。美其才。又出御製詩示公。公嘆仰聖學高妙。每起謝。必勸內侍挾掖。不令下拜。夜下三鼓。上悅甚。令左右宮嬪各取領巾。裙帶。或團扇。手帕。求詩。內侍舉牙牀。以金相水晶硯。珊瑚筆格。玉管筆。皆上所用者於公前。來者應之。略不停綴。都不蹈襲前人。盡出一時新意。仍稱其所長。如美貌者必及其容色。人人得其歡心。悉以進呈。上云。豈可虛辱。須與學士潤筆。遂各取頭上珠花一朵。裝公幘。

頭簪不盡者。置公服袖中。宮人旋取針線縫袖口。寢罷。月將西沈。上命輟金蓮燭。令內侍扶掖歸院。翊日。問學士夜來醉否。奏云。雖有酒不醉。到玉堂不解帶。便上牀。取幞頭在面前。抱兩公服袖坐。睡恐失花也。都下盛傳天子請客。

蔡魯公帥成都。一日。於藥市中遇一婦人。多髮如畫者。毛女。語蔡云。三十年後相見。言訖。不知所在。蔡後以太師魯國公致仕。居京師。一日。在相國寺資聖閣下納涼。一村人自外入。直至蔡前云。毛女有書。蔡接書。其人忽不見。啓封。大書東明二字。蔡不曉其意。後貶長沙。死于東明寺。因就叢焉。呂辨者。蔡門人。蔡罷。珠履盡散。獨呂送至長沙。呂乘閒問蔡云。公高明遠識。洞鑑古今。知國家之事必至于斯乎。答云。非不知也。將謂老身可以幸免。

徐神翁自海陵到京師。蔡謂徐云。且喜天下太平。是時河北盜賊方定。徐云。太平。天上方遣許多魔君下生人間。作壞世界。蔡云。如何得識其人。徐笑云。太師亦是。

紹興間。吳山下有大井。每年多落水死者。董德之太尉率衆作大方石板。蓋井口。止能下水桶。遂無損人之患。有人夜行。聞井中叫云。你幾箇怕壞了活人。我幾箇幾時能勾託生。觀此。不可謂無鬼也。

徽皇聞米元章有字學。一日。于瑞林殿張絹圖。方廣二丈許。設瑤瑤硯。李廷珪墨。牙管筆。金硯匣。玉鎮紙。水滴。召米書之。上出簾觀看。令梁守道相伴。賜酒果。乃反繫袍袖。跳躍便捷。落筆如雲。龍蛇飛動。聞上在簾下。回顧抗聲曰。奇絕。陛下。上大喜。盡以硯匣鎮紙之屬賜之。尋除書學博士。一日。崇政殿對事畢。

手割子。上顧視。令留椅子上。米乃顧榮殿云。皇帝叫內侍要唾盂。開門彈奏。上云。倭人不可以禮云拘。一日。見蔡魯公。蔡云。元章書法之妙。今日可謂第一。龜山須還他。曼卿佛牌爲第一。米曰。恁地時。龜山卻且作第二。米有孔子贊曰。孔子孔子。大哉孔子。孔子以前。未有孔子。孔子以後。更無孔子。孔子孔子。大哉孔子。篆書刻石。

東坡在惠州。佛印居江浙。以地遠無人致書爲憂。有道人卓契順者。慨然歎曰。惠州不在天上。行卽矣。因請書以行。印卽致書云。嘗讀退之送李愿歸盤谷序。愿不遇知于主上者。猶能坐茂樹以終日。子瞻中大科。登金門。上玉堂。遠于寂寞之濱。權臣忌子瞻爲宰相耳。人生一世間。如白駒之過隙。二三十年功名富貴。轉盼成空。何不一筆勾斷。尋取自家本來面目。萬劫常住。永無墮落。縱未得到如來地。亦可以嘯鶴鸞鶴。翱翔三島。爲不死人。何乃膠柱守株。待人惡趣。昔有問師。佛法在甚處。師云。在行住坐臥處。著衣吃飯處。屙屎撒尿處。沒理沒會處。死活不得處。子瞻胸中有萬卷書。筆下無一點塵。到這地位。不知性命所在。一生聰明。要作甚麼。三世諸佛。則是一箇有血性的漢子。子瞻若能脚下承當。把一二十年富貴功名。賤如泥土。努力向前。珍重珍重。

唐一行菩薩人曰。吾嘗得古人相法。相人之法。以洪範五福六極爲主。觀其所由。察其所安。可得大槩。若其人忠孝仁義。所作所爲。言行相應。顛沛造次。必歸于善者。吉人也。若不忠不孝。不仁不義。言行不相應。顛沛造次。必歸于惡者。凶人也。吉人必獲五福之報。凶人必獲六極之刑。不于其身。必于其子孫。若

但於風骨氣色中料其前程休咎，豈悉中也。

荆公舉一酒令云：有客姓任名稔，販金販錦，關吏止之曰：「任稔，任入金錦禁急。」又字謎云：「目字加兩點，不得作貝字猜，貝字欠兩點，不得作目字猜。」賀、資二字也。又四箇口盡皆方，加十字在中央，不得作田字道，不得作器字商，圖字也。

燕北風俗，不問士庶，皆自稱小人。宣和間，有遼國右金吾衛上將軍韓正歸朝，授檢校少保節度使，對中人以上說話，即稱小人。中人以下，即稱我家。每日到漏舍，誦天童經數十遍，其聲朗朗然。且云：對天童豈可稱我。自皇天生我，皆改爲小人。云：皇天生小人，皇地載小人，日月照小人，北斗輔小人。前後一十餘句，凡稱我者，皆改爲小人。誦畢贊笑云：這天童極靈聖，王少師云：若無靈聖，如何持得許多小人。然小人有母，皆背小人之食，小人之稱，其來古矣。施之于經，是可笑也。

隆興初，賀子忱知樞密院，有武臣陳理公，嘗稱從軍三十餘年，累立戰功。宣和年第一次，燕山府立功，靖康年第二次，白溝河立功，第三次，黃河立功，第四次，京城立功，建炎年第五次，海州立功，第六次，揚州立功，紹興年第七次，瓜州立功，第八次，和州立功，第九次，太平州立功，辭氣不平，謂朝廷推賞一次輕于一次。賀正色云：只爲邊功一次近于一次。武臣無詞，聞者稱服。

宋相郊居政府，上元夜，在書院內讀周易，聞其弟學士祁點華燈，擁歌妓，醉飲達旦，翊日，諭所親令詣讓云：相公寄語學士，聞昨夜燒燈夜燕，窮極奢侈，不知記得某年上元，同在某州州學內，喫齋煮飯時否。

學士笑曰。卻須寄語相公。不知某年同某處喫齋飯。是爲甚底。

元豐間。宋開使者善人倫。上知而問云。朕相法如何。對云。陛下天日之表。神明之姿。下臣不得而名。又問。王安石如何。對云。安石牛行虎視。牛行足以任。虎視足以威。又問。卿如何。對云。臣草木瓦礫。陛下用之則貴。不用則賤。

張天覺丞相再召到闕。謝表云。十年去國。門前之雀可羅。一日還朝。屋上之烏亦好。後有一達官效顰云。十年去國。不聞長樂之鍾。一日還朝。復見大君之鼎。見魏漢津所鑄九鼎初成也。

明節劉后。一時遭遇。寵傾六宮。忽苦痞疾。臨終。戒左右云。我有遺祝在領巾上。候我氣絕。奏官家親自來解。語畢而終。左右馳奏。上至哀慟。悲不自勝。領巾上蠅頭細字。其辭云。妾出身微賤。而無寸長。一旦遭遇聖恩。得與嬪御之列。命分寒薄。至此天折。雖埋骨于九泉。魂魄不離左右。切望陛下以宗廟社稷之重。天下生靈之衆。大皇帝姬之多。不可以賤妾一人。過有思念。深動聖懷。況後宮萬計。勝如妾者不少。妾深欲忍死。而與君父訣別。誦限已盡。不得少留。冤痛之情。言不能盡。下有數百點。悲切之旨。不能盡記。自後左右每欲寬解。必提領巾。上愈傷感。聞者謂李夫人不足道也。林靈素謂后是九華安妃。臨終聞本殿異香。晉樂。次年有青坡術士見后于巫山。髣髴鈿合金釵云。

叔父太尉、昭陵之甥，親見宣政太平文物之懿，逮事太上，備膺養遇，在帝左右，銜金出疆，凡耳目所接，事出一時，語流千載者，廣記而備言之。世昭敬請而集，名曰錢氏私誌云。姪迪功郎秀州嘉興尉世昭序。